

21/08/1997

PKLBM sasar lima emas

Zairee Zahir

PERSEKUTUAN Kebangsaan Lumba Basikal Malaysia (PKLBM) menetapkan matlamat membawa pulang sekurang-kurangnya lima pingat emas dari Sukan Sea di Jakarta, Oktober ini.

Jurulatih kebangsaan, Ng Joo Ngan, berkata dia menjangka kilauan emas dicapai menerusi acara 3km berpasukan dan individu wanita, 1km dan 4km perlumbaan mata lelaki serta acara lebuhraya.

Bagaimanapun, katanya, 19 pelumba negara yang tersenarai dijangka mampu membuat kejutan membawa pulang beberapa pingat lain berdasarkan latihan dan prestasi masa kini.

Menurutnya, PKLBM sudah mengenal pasti pelumba negara ke temasya dwitahunan itu dengan barisan berpengalaman mengetuai senarai bagi acara lebuhraya.

"Tsen Seong Hoong, Nor Effandy Rosli, Azizan Manaf, Musairi Musa, Shahrulneeza Razali dan Suhaimi Keton akan bertanding dalam acara lebuhraya dan mereka dijangka tidak akan menghampakan kita," katanya semalam.

Sementara itu, antara pelumba trek lelaki yang terpilih ialah Wong Ah Thiam, Mahathir Hamad, Haris Fadzilah Osman, Lee Robert, Faizul Izwan Abdul Rahman dan Jamil Kadiron.

Empat pelumba wanita yang tersenarai dalam kedua-dua acara trek dan lebuhraya pula ialah Nor Haslin Sulaiman, Halimah Mohd Jania, Masleza Nordin dan Siti Sarah Muda.

Menurutnya, matlamat lima pingat emas itu rasional dan memadai berdasarkan hanya 11 pingat yang menjadi rebutan.

Pelumba negara memenangi satu emas, satu perak dan tiga gangsa di Sukan Sea Chiang Mai.

Bagaimanapun, Joo Ngan tetap bimbang cabaran pelumba Indonesia selaku tuan rumah dan kuasa basikal Asia Tenggara, Filipina, yang dijangka mampu menggugat pelumba negara.

Selain itu, katanya, kemampuan pelumba muda dari Thailand dan Vietnam juga perlu diawasi.

Menurutnya, pelumba negara berkesempatan menguji keupayaan masing-masing sebagai persediaan ke Jakarta dalam saingan enam peringkat Kejohanan Lumba Basikal Jemputan Wilayah 1997 Jelajah Merdeka Langkawi-Kuala Lumpur yang bermula Ahad ini.

(END)